

摘藻堂四庫全書薈要

集部

欽定四庫全書薈要

集部

秋澗集卷一至三

臣董誥詳校
詳校官助教臣謝登雋



欽定四庫全書叢要

秋澗集

提要

臣等謹案秋澗集一百卷元王惲撰惲字仲謀汲縣人世祖時官翰林學士承旨事蹟具

元史本傳惲文章自謂學於元好問故其波瀾意度皆不失前人矩矱詩篇筆力堅渾亦能嗣響遺山史稱惲有材幹集中關係政治



諸作尤為疏達詳明瞭如指掌其集凡詩文

七十七卷又承華事畧二卷乃裕宗在東宮

時所撰以進者裕宗甚喜其書令諸皇孫傳

觀焉中堂事紀三卷載中統元年九月在燕

京隨中書省官赴開平議事至明年九月復

回燕京之事於時政綴錄極詳可補史闕烏

臺筆補十卷乃為監察御史時所輯御史臺

故事玉堂嘉話八卷則至元戊子所作乃追

記在翰林日所聞見者凡文章得失典制沿革皆彙而錄之甚稱精核所論遼金不當為載記之說尤為平允後托克托等以宋遼金三史並修實本其說其明於史法亦非楊維禎諸人固執偏見者所及也乾隆四十三年四月恭校上

總纂官

臣

紀昀

臣

陸錫熊

臣

孫士毅

總

校

官

臣

陸

費

墀

欽定四庫全書薈要卷一萬六千一百五十七

集部

秋澗集卷一

元 王惲 撰

頌

中統神武頌

并序

維二年春王正月逆羶悖負天恩扞我大刑裒奸株
頑嘯克東土於是命將致討天戈一麾不五月而克
清大憝茲蓋皇帝陛下寅奉天心布昭神武睿智足
臨有征無戰故也昔肅宗中興唐室而元結獻頌用

歌大業垂示無極臣憚忝屬太史親覩盛事頌聲不
作咎將曷歸敢綴緝所聞謹撰中統神武頌一首凡
千有一百二十四字雖辭理未應庶幾神武仁聖之
德鏗鉤炳耀播宣金石振一代之徽烈也萬冀微誠
仰蒙天聽臣憚惶懼昧死拜手稽首而獻頌曰

皇帝踐祚粵維三年萬靈清蹕廼狩于燕曰寒而寒曰
燠而燠百度脩明朝廷清肅東截海表西亘庸濮悉臣
悉貢罔不率服時維逆彊禍心久纏再世鴟張額征擅

權奄殿全齊厲階泗漣煮鹽涸海剝銅夷山地顯物衆
蘗芽其間懜恃奸囂海波可田背脅疽根怒而自鞭時
徼邊外功示忠惓警我宋急騎通甘泉帝以德御聽之
誠然再命不庭穢彰溥天浪駭鯨奔擬騰百川投袂東
來盜我西偏天意有在聚而殲旃皇帝神武不震不愆
燎我神鼎烹此小鮮命將興師策出萬全方叔召虎爪
牙利宣爰命宗王相臣是丞顗彼封拜虎符發兵赫赫
禁旅犀甲熊旌相臣曰璧維周之楨氣蓋一世徐方震

驚皇帝曰嘻殲厥渠魁脅從罔懲既誓我師銳莫與爭

賊謂我怯蠭蜂來乘一戰而退曠懷自矜徐以有待孤
城自嬰皇帝曰嘻擅不時下我民是恫武畧神機運之
淵衷丞相天澤相與謨謀乃拜稽首賊出下籌稀窺于
苙不死何求繚以巨堙畢克于秋帝曰元老壯哉謀猷
其往視師代予以休馬首既東零雨其濛精彩一變氣
吐而虹萬杵一動月暈而墉山斷外援水防內通高壘
深溝俟其自斃日壓賊營雲頽死氣賊勢既窘魄褫心

悸鼠拔其牙獸奔厥角斧偃螳潛鋒摧蝟縮七月壬戌
環隄內訌賊伺我隙悉甲來攻萬死幸脫窳我梯衝相
史相趙出奇無窮既敗而壁衆猶嘯凶迨其癸酉有星
蓬蓬驕若矢石妖聲墮空因之出降羣凶率同彼狡狂
卒不知所圖銜窶鼠竄自投於湖宛轉不死可知其愚
童子執戈縛之以趨比梟逆首磔裂其軀并取同惡牽
孥就誅林林部曲面縛俟死皇帝曰噫皆朕赤子若蠢
何知一從先旨解甲投戈縱歸田里東際海壖西逾膠

濟殺氣一空歡聲四起既定歷城東趣廣固比傅城下

降幡內豎凡厥士女無或畏懼取彼逆屬取其府庫市

肆農耕安堵如故累累婦妾婉婉弱齡三木囊頭來獻

闕庭既令市朝咸即厥刑盡頒所獲大犒將旅稠載驩

呼各歸禁伍勞我元臣其安爾所視我民政袞闕則補

肆赦東方皇恩斯溥錄我陣歿卹我孤苦舊染維新各

安爾土皇帝曰噫額額歷城橫燎兇熒干戈所歷復其

租斂惠賜穀帛拯其昏墊陰伏陽開乾旋坤奠海岱重

清一出聖筭奄奄北風驚而遠竄威懾蠻貊東夷來獻
蓋代稱觴萬口交慶再拜稽首皇帝神聖天錫勇智萬
邦以正億萬斯年受天明命皇帝孝友敦序九族有爵
有土煌煌車服終歲燕賜克諧克睦帶礪山河與天齊
福皇帝睿哲別白忠直天賚龐臣左輔右弼孰敢予侮
為天立極皇帝聖慈約法好生奚取八辟三章更輕大
獄之起寧失不經如擅之誅萬死何容罪止一族餘無
所從漢制黨錮唐興羅織濫及無辜慘莫之惕天地大

德曰生曰植致討以來惟天是則吾皇之心堯仁舜德
海宇熙熙春臺壽域羣臣歸美度越前古唐平淮西漢
滅吳楚以今方之其烈斯鉅規規孝景計誅臣錯岌岌
憲宗皇咨于度兵纏四載吳縛于愬惟此齊功五月而
成斷以睿筭畀之戎衡皇帝執謙弗居弗處宗廟之靈
將士之助敢告成功于考于祖祀事載明牲牢鐘虞榑羽
崇牙應田縣鼓肅雝和鳴先祖是聽神靈曰都嗣皇之英
持盈之德守成之能保我不祚萬福是膺壽等南山不

騫不崩小臣眷眷職司述稱屬辭比事獻芹之誠親覩
盛事拭目太平淵默無言咎將孰勝冒昧狂斐觸犯雷
霆敢撫輿議用垂頌聲

賦

蛾眉研賦

并序

余家所役二硯研磨有年殆與瓦礫不異書生作計
朝夕筆研間所用若是欲善其事而不能也宜矣乙
卯春偶得是硯於販夫之手質名于譜蓋歛石蛾眉

之種也噫豈天誘愚衷將為文字之祥邪抑亦有數
自王氏而發潛德之光耶遂筆而賦焉其辭曰

默齋主人行年廿有九日從事于翰墨將遊心于道園
家畜二硯形模老醜研磨歲深埃塵瓦缶歎材石之莫
遇偶見授于野叟發此秘藏殆天所誘歸予之月外插
其斗從吾囊之羞澁喜溪光之照牖其質圓以古其色
綠而黝鬼擲瀉壁鏡蝕秦紐太初之面目已露元氣之
胚胎未剖涵玉德之餘潤鑑金聲于一扣其閱人多矣

幾墨翻于醉袖也肌理細膩豐而不蔀顧溪痕之隱然
旋摩挲而無有雪浪翻江映日光走其瑩滑溫純之德
誠硯中之瓊玖也若夫蒼文上橫眉嫵初就濃抹遠山
濯如春柳其橫雲却月之狀又似開乎成都之畫手質
名于譜茲歛石蛾眉之右也予想夫龍山之英歛溪之
瀏醞釀幾年鍾此奇秀信神物之有歸不圖為默齋座
中之友也當其書幌晝明筆耕而耨一噓泣然雲蒸霧
湊試墨花于春融覺松風之瀉竇縱未灑薔薇之春露

聽此亦足以醒張顛之宿酒也相期百年以介爾壽研
分硯兮汝名雖異儻浮于實兮終有愧于屋漏故東坡
有云澁不拒筆滑不褪墨茲乃研之佳焉又何必鸛其
目而鳳其味也邪

茹野菊賦

并序

丙寅春三月予以司明告病避忌食物無可供嚼嚙
者家人輩采菊芽為蔬考之圖經味甘平療風熱于
頭目極順適也遂筆而賦之其辭曰

寒予投劾而來歸兮守先人之故廬日閉關而却掃兮
殆幽潛之不殊視外物其敝屣兮將游心于聖書何庖
厨之遠戒兮幾釜中之生魚嗟肉食其無相兮喜盤蔬
之有餘潔我晨羞出于不虞擁案未前露香滿裾童子
啞然而告予曰茲野菊之方苗適采擷于林墟考之圖
經食有益于頭顱也若夫春芽翠茁方莖碧腴湯沃苦
盡鼎調氣濡甘湧舌本味欺園蔬拉晚菰以為友役春
蒲而作奴貯空腹而不厭恐落英之不如彼寒花之可

愛寄高情于一壺縱傲睨乎秋霜踰佳辰而日疎此方
騰藉春陽中拆而敷收微生于全體供野人之所需吾
乃瀝芳馨而三嘆覺眼華之掃除其氣平夷其樂舒徐
豈一杯之野馥等悅人之蓂芻雖草木之誑口亦因茲
而起予世有啖糠覈而瓠肥厭梁肉而黑瘦豈非適于
口而心苦濡以膏而體劬吾知甘菲薄以自樂能充悅
其體膚既而隱几冥坐心明志虛佳境翛然恍與夢俱
以神為馬以尻為舁既發軔于菊潭或弭節于山隅訪

淵明于栗里尋天台之隱居然後鼓東南之歸柁追散人于江湖覺而賦之猶足以續離騷而弔三閭也

未央瓦研賦

贈終南李鍊師和甫

斗直寅日維酉栩栩蝶化夢入靈囿覺而叩門有來玄
輿投我天研形圜色黝鬼擲瀉壁鏡蝕秦紐文章鬱律
蛟蟠虺走以長樂無極而言乃漢殿燼餘之瓦首也當
其炎運天開禹碑秦陋未央屹建長樂丕構體紫極之
圓方壯神麗于九有俾子孫無復加于後也若夫萬疊

雲浮跨凌天宇鱗影參差鰲背掀舉瓊綴簷牙香團桂

樹倒景激日馭之光流潤浥金莖之露聳萬國之衣冠

蔭千秋之歌舞礪太華而帶河渭謂斯瓦之貞固天落

妖彗一掃而去吐爾微質歸復其土何千歲而不化偶

野人之與遇今歸乎我又係厥數摩挲漢月碧花燦吐

似喜余之主也試玄蛟兮海運瀉松風于牕戶滑不墨

褪澁不筆拒然復其天則御陽

周宣王
宮名

之耳孫較其古

乃銅雀之鼻祖彼鸛其眼而羅其紋味則鳳而形則

闕

用或

闕

奚足取是不若茲瓦之

闕

屋廡生聚帡幪霜雪蔽虧風雨是則用得其所付大任于汝也豈其隸几呈材辭客與伍處雖失宜其功尚溥鍛我銛鋒藉汝涵涓乞英靈于班馬鑑興亡于今古大書特書猶足以旌朱游而削張禹也道士顧笑吾子其為我賦之

三峰晴雪賦

并序

乙亥歲冬十一月余以守吏將事自蒲抵華倉惶待

命于塵坳間望三峰晴雪煥爛高潔皜不可尚已顧
而自憐豈勝慚穢適與左山商公遇于祠南柏行間
歸作是賦以寄其辭曰

華于衆嶽峻極莫之京兮三峰絕觀松雪益其清兮倒
景旁射銀闕爛崢嶸兮仙掌翻空灝爽下青冥兮豈玉
井蓮芳仙遊擁霓旌兮巨靈變現咤崑丘之瓊兮金天
移仗敞瑤華之宮兮冷飈吹而不滅海月照還空兮軒
豁呈露何物外之雄兮又如螭蟠之老子與希夷之鉅

公朗出天表飲太泉而遊封中兮安得杖仙人之九節
登神丘之崇兮問真源于白帝追二公之踪兮胡一行
而作吏捨塵土之容兮對清都而不克往世故驅以東
兮掉塵鞅而北驚刺梗滿吾胸兮望岳神而三歎歸夢
挂岩松兮縱靈移之罔誚獨不愧于躬兮歸而賦之吾
言固誇猶足以為執熱者之清風也

熙春阮賦

并序

玄暉上人得隆德故閭餘材斲而為阮因以熙春目

之亦文殊之義也至元戊寅春同甯尹端甫劉御史
叔謙趙太博彥伯坐心遠軒師為鼓綠水悲風二曲
清越悲壯坐客感歎興亡有愴然于懷者師請予賦
之其辭曰

天新雨風日妍心與閒會境趣靜便拉曠懷之逸士過
雪庵之老禪斂袂危坐添爐炷箋于是出桂阮調素絃
控臍月而當抱撫筠柱之橫駢師曰茲熙春之斷餘偶
絲之而清圓者也遂鼓一再行清越悲壯如泉咽水底

風行樾間條條兮欲斷而復作淙淙兮似漱而還潏鏗
爾擿銅丸之韻淒兮聆高樹之蟬又如游士騁說劍歌
去燕何辭氣之縱橫激太清而沉羽淵客乃呀然而驚
慘然而悲信乎物之感人有不期然而然者想老徽之
般樂盪侈魄以無前厭華陽之湫隘敞樓居而致仙海
鰲首抃金鵬翼騫鬱鼎蓮之香霧鎖月殿之嬋娟陰千
秋之歌舞壽艮岳而不騫俄龍移而鼎去繼金亡而閣
遷殆露槃之聲折悵秋風而涕潛興廢一瞬兩朝百年

委繁華于野草鎖莽苑之荒烟吐此木之何幸遇幽人
之達觀納彌羅于芥子寓餘哀于一彈猶足以舞魚龍
于海曲洗亡國之愁顏也嗚呼噫嘻向之使人凜而悲
者物詎能動于人哉人之哀樂妄為物之所牽不知太
虛寥寥既寂而玄唯此理之默識何繁華廢興之足歎
師曰子其為我賦之吾欲秋月當戶松風滿軒寫仲容
之別操合清商而洞宣使雲陰蔽空古鶴下蹊走商延
于濮上掩新聲于師涓也

弔廉將軍墓賦

并序

三代而下功利之說興人臣擅恃功能鮮以禮讓為國者觀頗挾勲內忿怵居人下加諸彼不淺相如引車避嫌有犯無校蓋出天稟粹然處之為非艱至頗聞急先一言遽能握髮數罪受責門庭在將臣為實難若將軍者可謂不遠而復得無祇悔之義哉遂摛文以弔辭曰

涉滹沱而北驚兮遇常山之故城何高丘之突兀兮鬱

劍氣之崢嶸野人指而告予曰此廉將軍之封陵也人
與骨而塵朽兮義猶粲乎日星遂陳辭而弔古今命僕
夫以停征嗚呼休哉昔伯禹之所以聖兮始不伐而不
殄秦誓之所以經兮善悔過而胥盟觀戰國之多士兮
依希猶三代之英惟功利之時尚兮天理有時而蔽明
能不遠而復初兮其惟趙之廉卿方國都之中立兮資
內附而兵精頗分閫而秉鉞兮騰茂實而蜚英聲梁從
隨而楚讐兮燕弭伏而齊并時有以卜將軍之意氣兮

殆雷動而滿盈遽相臣之出右兮何發言之盈庭幾肉
餒而食甘兮奮兩虎之必爭及聆急難之一言兮輒弭
耳而服膺復頓顙而悔過兮折節負贖罪之荆在引車
而不必多兮將臣及此所以為古今之難能也逮漢起
而帝稱兮禮飲至而策勲何諸將之失度兮至擊柱而
紛紜安得將軍從容為一言兮解販繒屠狗之禁彼臣
濬之冒辜兮加克渾之貪蒙咤吳平于帝前兮互滔天
而為己功安得將軍滌易其褊薄兮俾無成而有終嗟

鄂國之列公兮挾勲勞而凌帝宗縱私忿而無忌兮一
墮夫臣子之恭安得將軍北面而同列兮以中和之氣
銷悍戾于未然之胸也雖哀之而不能鑒兮文空言其
奚庸緊慨慕其耿光兮日三省乎微躬蕩吾伯夷之隘
兮擴乎穆公之容希前賢而同升兮負驥尾而竭忠雖
斷斷而無它兮庶幾凜凜德讓君子之風衝山烟而暮
去撫鳴劍兮增雄

登常山故城賦

我登常山心慨歎兮斷城連絡蛇陳蜿兮憶當金盛兩
漢間兮萬井歌吹魚龍淵兮椎埋劍擊習俗然兮光沈
響絕夫何言兮有懷古人秉心延兮交如餘耳始足賢
兮烈如顏袁抗偽燕兮垂光竹帛星日懸兮壯哉子龍
屋而祀兮膽氣滿軀勇夫志兮賊瞞臣漢得所事兮天
理在人一符契兮千載仰止初無異兮諒彼有立忠與
義兮

鶴媒賦

并序

中統二年予在上都掌記中堂客有負青障挾長

闕

二鶴馴于後以廩繼來請問其役曰以鶴取鹿者也
嗚呼鶴善類也喙雖長不鉤銛以噬爪雖巨無斲指
以攫而于鹿伏容有忤害其如人之不仁何至元壬
午冬與禮部王兄子晃因話及此慨然有感曰今人
以智計相傾內險外易者何殊于鶴之取鹿也作鶴
媒賦其辭曰

萬物者元氣之盜氣之靈者莫人若也既役物而君之

其忍以盜作智而為得計乎如絳鹿草間圖鷓鴣紮地皆
紙求蜂葉城網雉盜物矜雄此何足異以智獵愚理固
宜然用愚戕愚斯則不仁之極也鶴本善類與物無忤
飛翔寥廓仙游之驥教之羽舞已違元性詐以標鹿遂
戕彼命是則鶴之善人則用而險之返有過于機穽也
鶴了不知鹿終弗悟歲供庖厨皆鶴之故何殊人心內
險外易以詐假仁顯比陰忌將取彼有則必姑與彼昏
不知日狎而伍一落其機投足無所誠何異以鶴而媒

取也吾然後知物之顯暴者既得豫而防之愚而深中者尤不可玩而侮也示我同志筆而賦之

黑猿賦

并序效庾開府體

至元十七年二月己卯清明日陪經畧助祭丞相忠武公墓適嗣侯平章稽自靜江籠致是猿以獻西溪王通議命余賦之以紀奇觀其辭曰

寶符之野潯池旃鎮人初樂歲華新峴山正有墮淚感走馬遠出西州門映堂堦之碧草陪開府之嚴裡覩萬

物之來享宛有勝于攸聞繫爾猿之蟲質尚其性之能
馴素面掌許玄裳若纁尻不識尾臂長于身一動一靜
既恒且仁澗飲岩棲有彞有倫木方華而不折菓視熟
而呼分思全生于物表時隱見于冬春三峽秋月九嶷
暮雲雪嘯烟啼子從母奔動射者傷弓之慘驚山人應
聘之輪哀楓林之逐客助永夜之霑巾其或隱挂虛壁
幽尋窈窕避羣猿之喧躁悟善惡之難并去王孫而賈
絕誠可愛而靡可憎也故或者謂袁周之士夫從昭王

而南征痛膠船之不返化若類而成羣恐此事之臆臆
伊誰聞諸水濱淡夕陽于平野送歸鞍之逡巡偶吐辭
而為賦念此物之貞純或體玄而尚寂要擇善而相親
以升木而取喻庶有感于斯文

蟠木山賦

丁亥之冬夜氣清淑夢遊石林萬玉嶠崿明日與客步
入李叟叟字希賢之塾燎爐却寒有蟠者木輪囷離奇大屬
吾目負之與歸而為秋澗坐中之物其為狀也左抱右

擁或疊或窪蹄股交峙口鼻互呀于是抉洞穴振泥沙
分嶺嶂剪杈枒坳者壑突者丫去朽剔蠹磨光出華丹
丘赤城凌空散霞不知沈湮于地中者幾年一旦聽吾
喙之橫誇若乃峰頂改色湧雲倒懸岩崦層出峽門洞
穿刻畫嫫母與施并妍其磊落盤錯自一成而有足觀
也吐此怪供強名曰山然為幸也蓋有大于是焉不腐
而為朽壤不化而為飛烟收槁梧于爨下遇中郎而獲
全蔭居華屋之底植立几席之前聳太華三峰之秀有

象江六石之堅終日與伍似非偶然徙倚蒼精之蓋摩
挲白鹿之巔何淡僻之苦樂掇衆人之所捐吾愛夫始
賤而終貴先汚而後蠲出神竒于腐朽蛻凡骨而得仙
者也噫以靜而致壽者山之性隨帝而出震者木之權
唯動靜之交見渾體用于一源吾固哀謝拙于變遷以
靜為樂以安為便藏吾所別之器浩吾固有之天守介
節而不易庶茲蟠之可鐫安時處順出艮震兩者之間
不然造物者憐其不材辭剪伐而終天年其將與憚周

旋孰得惡而舍旃客曰汝言雖夸以山木而較之似不
膠于一偏予其為我賦之若足以折詭辯于莊叟發新
意于老泉也

秋澗集卷一

欽定四庫全書蒼要卷一萬六千一百五十八

集部

秋澗集卷二

元 王惲 撰

五言古詩

拜奠魯文憲王廟二十八韻

丕承固云烈嗣王幼而冲嬉戲剪桐事安知多難衝公
乎居斯時岌岌遵渚鴻外謗流四國內疑叢一躬負展
令百辟天心昭懿忠想當假寐際寅亮天地工陳誥開
治源奠遷營洛宮南服靜海波東征殄元凶吐握下白

屋憲章矢淵衷罄單一德聖恩兼三王功及夫就臣位
畏脊何躬躬制作方萬古世道仍汙隆至今豐鎬間凜
有三代風饗以宮懸樂報之不爲豐宣父稱大哲寤寐
雲從龍垂老無復夢慨焉吾道窮丹青見遺像皜皜日
在空臣子知所止仰之餘敬恭悠悠蒼姬下輔相業不
同論思機務地典調簿書叢豈其世務焚經權有違從
顧惟大臣體一節貴始終伊公狼狽間不失體與容几
几兩赤舄儼立如岱宗我嘗集衆美一言蔽其中至公

絕貪私廓與天人通作詩庶補衮九章一華蟲精誠有
來格寒雲動龜蒙

拜奠宣聖林墓

庭訓墮渺茫師授悖嚴誠羌予不惑年行已得夷隘今
歲客東魯似爲神所介駕言逐秋風得展闕里拜遙遙
魯甸餘汶水走湍瀨憑軾望雲林鬱鬱佳氣變齊莊趨
兩楹奠獻成孤酌歸然三聖封仰止高泰岱恨生千年
後今夕備掃洒披雲覩天日太極開一畫彼蒼詎能言

諄諄聖為代三綱與九法範圍無內外君臣以之定乾坤以之泰東周不可爲述作萬世賴藐聆徇鐸音元化雷雨解敬想燕居容金聲鏘玉佩當時七十子授受儼如待鳳兮鳴幾時諸子沸秋籟一朱亂紅紫百穀茂穉稊稗愚者甘下達誕者樂語怪韞藏寶康瓠幹葉清廟薦明倫得不泯而有六經在天高孰可階一氣包厚載兹道固難言嘿契心有會胸中九雲夢吞納失蒂芥循循善誘辭師也書之帶緬懷伯禽業郁郁文獻最三桓張

公室霸功熾而忭一奢去無復荒陵餘石獬煌煌天乙
孫膚敏半冠帶德傳慶自修道大世能邁金尼貫元精
泗波來遠派汪濊一聖海不隨梁木壞歸侍金絲堂攝
齊聞磬欬恍如到帝所鈞天廣樂備洗我兩耳聽肉味
忘一噉詠歸寫遺音風雅變鄘邶一簞老東家吾知其
樂大遲遲不忍去寒日下蒼檜

陪總管陳公肇祀商少師比干廟

元化形萬彙浩浩無時無云何忠貞氣大畀先生軀念

昔有殷季天步移獨夫淫酗蕩祀典下民為毒痛所崇
盡奸回啟遜箕子奴師保乃云爾餘敢編其鬚炎炎鹿
臺火已兆明珠襦先生豈不知蔓草不可圖顧親叔父
尊以位仍三孤強諫誠我任剖心不為瘡自靖暨殺身
要之宗社扶所以宣父筆三仁同一途繫公存亡間所
係重有殊堂堂柱天手能繫火德烏當時戡黎兵所侵
良及膚周雖彼蒼眷加翼十亂謨令其諫少行終鄙西
人居稱師止觀政安取商郊車一朝嘆云亡宗國隨之

墟丹誠皎白日餘烈光八區率爾來代臣大節知所趨
嗚呼介士嘆萬萬狂童且今來二千載殷周兩榛蕪巍
然一丘土高與西山俱清霜九月節肇祀陪千旗肅拜
列階下精爽動佩裾世道有淪喪一忠千萬諛商歌振
林樾日下悲風徂

擬韓子秋懷十首

出郭行時稼秋風正疑疑臨川閱逝波浩浩去不已富
貴來幾時及此行樂耳把酒對西山坐看秋雲起天矯

化龍蛇異狀紛莫似世態初不殊儻來安可恃我懷拔
俗標干霄仰逸軌酒酣歌鳴鳴振衣私自喜

秋風拂庭柯物意自含悴松柏抱貞心表表歲寒地長
年豈致養易衰匪自恣浩浩一氣中所稟蓋殊異人尤
物之靈要以天爵貴

天運健不息君子戒靡曼讀書下梗塞飢餓充藿飯造
道苦不深紛華非所願秋風動黃鵠千里奚足歎風濤
北溟鯤變化搏九萬大邦易為仁郁郁文獻半出處貴

有時莫遣夜鶴怨

攬衣起秋早露氣清淩淩偶書秋懷篇悞筆成蒼蠅吾
言固不佞未免人屢憎聖域有坦途學步高山陵尋源
有靈槎臨池弄魴曾我生恐不偶鄙事從多能

虛室生夜白清露發鶴警空庭海月上愛此良夕永今
年苦煩歎似值苛政猛盼盼秋風來汲深持短綆庭菊
被焚燎脫禍乃差幸朝來有佳色一笑倚軒屏露叢低
寒花促纖泣暮景呼兒曝羣書趁此秋日炯敝帚享千

金利途競纖梗二者昧所思厥病失坐騁既悟前日非
敢事子淵請

長夜苦漫漫長空星斗暗商歌南山翁遺佚有餘憾祇
知享高明曾何恤鬼瞰而我獨於世滋味嚼蠟淡畏途
足風波汹汹洪水濫濯足尚云可浣纓豈宜暫此身矧
虛舟敢不慎簡纜天心幸私我書史日與勘庶還浩浩
天禾害家儲飢

殘暑不肯退秋陽麗庭軒靜觀消長理警此歲月奔成

功嘿嘿去天道何曾言
歛衣坐一室書帙散我前
開卷飫至味忘卻盤中食
最愛歸去辭雋嚼了一篇
作者古不少文字浩萬千
感君固窮節當年亦辛酸
遙持酒一瓢同醉東籬邊
九原不可作念之終歲年

青竹不耐暑索寞衆葉乾
白露下天雨洗此青琅玕
風枝簌餘潤暗滿佳菊團
依依南飛鵲遶枝擇所安
感時賦秋懷古井翻晴瀾
我生分已定安用智走丸
出門安所之呼兒解征鞍

閉門秋月上靜院圍蟲聲幽人掩窓卧一室翻虛明四
序倏以周代謝何其誠物華有盛衰天地從虛盈君子
順所履持身嚴五兵牛羊旦旦伐山木何以榮所慎獨
處際心蕩韓盧令

離離壠上禾望望日攸好不勤耘耔功秀實苦不早西
風卷黃雲收穫走隣保荒田棄足惜握之速其槁致役
貴厥初無為宋人道

九日和淵明詩韻

九日天氣好淡遊無友生懷哉曠達士愛此佳節名野
迴秋山高遠目增雙明手把霜菊枝吟泛風葉聲人生
天地間強矯無百齡歲月不我與大川日東傾且酌一
尊酒遺彼五鼎榮滿挹風露香陶我醉後情遇坎且復
止吾器期晚成

今歲節序晚天氣秋夏交衰草伴佳菊藉暖亦後凋居
閑愛節物不辭遠升高川澄涵鴈影空曠暖微霄舉觴
酌時人塵坌迺爾勞中間百年集龜卜將日焦何如遺

世士空杯樂亦陶得酒且歡喜誰能保來朝

寒雀歎

閑庭有遺粒寒雀往還飛眄睵傍無人翔集下疎籬一
啄復四顧慮為物所闕幽人負暄坐玩之淡忘機一笑
拂衣起羣驚向空歸因之感吾生分外非所期富貴倘
僥倖何殊鳥驚疑吾儕以義榮先賢有良規

觀葬者有感走筆為賦

西隣送喪車前後餘百人少壯亦歔歔老大尤悲辛殯

歸煮蒿里奄忽隨沙塵逝者長悠悠魄散還蒼旻存者
但追悼簞簋時空陳人生天地間變化朝菌新冥冥夜
臺下念之傷心神大限百歲止憂喜還相因況且不滿
百忍使憂纏身青春不再至歲月波注輪有釀不來飲
負此頭上巾

自喻

吾性懶且拙置書未嘗觀興來一披讀暫涉意已闌因
傷中道畫勉力鞭使前奈彼物外誘既往輒復還年來

天與幸繆當函丈間朝昏迫童課未免親書編開緘三
嘆息知學今十年雖傳失自習所得亦已偏正如乘跛
馬十步九躓顛引領望聖域尺綆汲丈泉有時尋墜緒意
會亦愜然務敏修乃來自棄誠可憐譬彼執鉋鑄緩治
榛蕪田縱弗曰收熟猶愈埋荒烟進進久不輟功豈止
百廬九原雖不復聖道具蹄筌堯舜等人耳悉自學至
焉從茲自發藥浩浩還吾天

改葬冥漠君

買樹植中唐下鋪得髀骨生世何為者何年此埋沒周
身瓦作棺上有劫灰覆黃泥滿髑髏麥枕餘故物神奇
到腐朽貴賤辨無復惻然戒僮僕掇拾百骸足徹我床
上簣包裹葬城隩奠酒一杯祭遣汝一盂餽同區三十
年今始改兆卜死者謂有知夢寐不一踟幽沈起有時
掩骼適春燠豈復識此為庶慰我心曲不無攘蓬嘆何
必桃李被免汝踐辱羞我豈微冥福長眠一抔土野祭
霑賸馥莫羨麒麟塚發掘為珠櫝自買身後禍安用高

哭兀去去冥漠君九原春草綠

青青兩桐樹示兒子阿孺

青青兩桐樹乞自幽人居植我庭階下護養嬰孩如汲
水時一溉要令地脈濡起架障炎曦插籬周四隅眄柯
日怡顏手把種樹書及夫始華月春芽茁蒼珠朝來秀
色發衆葉卷且舒終朝三摩挲愛此青玉株亭亭一尺
影翠蓋遮門廬嗟爾琴瑟材中與霜籟俱達哉蔡中郎
救爾煨燼餘我望十年後直幹凌碧虛秋聲泛韶濩雲表

來鵝雛且天生萬物因材而篤諸哉者厚其生傾者不
爾扶譬彼青衿子致養在厥初必擴心與志毋適尺寸
膚然有才不才學焉因爾殊緬懷孟子訓書以示阿奴

鹿喻

我本麋鹿性出處安自然金鑣非所慕志在長林烟得
遠機穿地食苹飲清泉呦鳴錫同類甘以辭華軒野兕
出其側暗蹂山前田農家向所害乃知獸之愆彼兒以
計去嘉禾歲芊芊野人居山中數畝事墾斷慮為町疇

場指鹿乃兕屬雖無獨及心見之惡且逐鹿心素無機
淡與標枝閑遁跡入幽谷擇音遠人寰尚為山中人置
疑齒頰間

送宋大使漢臣之任延安

四海王翰林高情比雲月一甌密雲籠過門誰復吸宋
君平生交矯矯峻風節况經患難間邂逅叙闊契每來
倒屣迎所請無不說賦詩近盈軸沽酒慰久客都門冠
盖揚聲華愈昭晰我初識君面論交心莫逆相看自淇

水燕地最多日吟鞍賞春華茶鐺煮晴雪劇談挾銳槩
洞達失堅壁茲焉一載強相從復相覓喜聞得新除腰
金出省闈烏臺退食歸入戶展齒折朝來高軒過打門
欣告別情親近中年何啻數日惡天涯兩淪落歲暮悲
風發人生幾河梁底物慰愁結觴君病不能贈言素所
拙君侯天下士抱負經世業鞭箠致錢流論吐究時瘼
吾子兩餘裕他人雙落寞黃鵠志千里秋天擬橫絕誰
能雜鳬鴈羣飛爭飢啄茲行固非僚歸愈垂空橐儘新

僮僕敬太慰妻子色延安西北秦地與羌渾接王氏六
十載厥賦尚寡弱保障慮不遑徵收肯騷削綠樹空野
烟山澤入籠絡秦風與隴月慘悴自茲作邊氓靖為重
聚歛聖所怍臨淵得河潤當念遠井渴得書下下考吾
子亦云樂我詩春秋法責備賢與哲此心能不爽蓬華
乃麟閣不須雙鯉魚時遣慰離索

溪田暮歸

疎林烟火微草露濕芒屨遲遲歸路長清月掛林杪依

依南飛鵲幾回驚且繞一枝幸得安誰復睇雲表田家
固作苦遺安子孫寶彭澤百日令解紱徑歸老我心默
有契縻爵豈有好違已病交攻飢凍正枯槁躬耕南澗
垂浩歌槃樂考

散步清溪湄

散步清溪湄。林殮憶鮮食。沙頭有漁梁。呼童樂閑逸。波清滿遊鯈。鬚鬢分纖悉。雖微知所避。矰之不可得。悠然逐風漪。相忘萍藻密。達人濠上樂。政自觀其適。人生風

埃中與爾何差別區區一己私奔走抵溟極萬事恐偶
然胡為較得失舉網出深淵高樹掛冥色長笑歸去來
吾道無固必

讀林和靖詩集

枯梢振驚飈茅齋寒日短幽懷久不樂訪友橋南館探
囊得逋集塵臆欣一浣賡歌竟遺編佳處時再款先生
玄豹姿清風滿朝簡仿像詩骨清雲嶺松雪偃湖光與
山綠几席供奇產呼吸貯肝脾元氣筆下綰逸情薄雲

月幽律發葭管靜觀周物靈遠覽豁襟散清遺郊島寒
淡入陶韋坦孤山富梅竹香動春江暖篇中幾致意似
慰平生眼客來佳話餘橫琴浮茗椀是中有真趣風味
亦不淺廬洛與寺閭意適欲忘返長空渺孤鶴容與歸
舟晚如斯六十春笑傲一何衍相去羲皇間不到牛鳴
遠暮歸傍窓眠清與江湖滿雋永愜初心有味叅玉版
燈花喜共妍一笑成微莞人生無百歲胡為日憂懣擾
擾聲塵中任事同蝨虱

西溪初泛同王子初訪柔克王公

自此多經遺山先生點竄

閑人無所適心向靜境趨今日欣有得快如脫籠拘步
出郭西門偶與佳友俱舍杖棹清溪忘授圯上書舟輕
風浪平泛若乘流鳬波光灩船頭雲陰翳平蕪畸人驚
見之輟耕立河淤白鳥去不遠前飛如導予故人喜我
至就船與相娛呼童下泝流載入酒滿壺促膝兩舷間
鰕蟲雜肴蔬吟杯斟且停要看傍岼魚從下恐忘返欲
上意轉徐瞪目看銀刀不知寒日晡纖鱗竟莫獲豈謂

吾網疎顧此一溝水安比松江鱸舟人云不爾近多狡
獠徒散毒河伯宮掇取地芥如卵毀鳳不至禁畧自有
餘釣網詎可並况乃詭計圖射利一至此世途足崎嶇
歸時還一笑兩岍風生蒲

擬古

北山介公壽也公之德澤及物如山之蓄殖焉是宜
得厥位而享其壽也故作是詩以頌焉

瞻彼北山維石峩峩邦民仰止匪丘匪阿既峻而極復

委而佗元氣中宰所蕃寔多維公之德如山而峩
瞻彼北泉維漈於垠淵淵其源浩浩其春澄之弗澈撓
之莫渾潤餘一方波彼四隣維公之澤如泉之新

瞻彼北山有松桓桓氣幹千尺盡歲之寒棟樑大厦是
依是安未宏厥用心怡體胖美蔭所庇物為一天匪惟
薦蘿有蕭有蘭受德匪報茅菅厚顏維公之壽如松之
年

北山三章二章章十句一章十六句

過劉元海陵寢

漢統天久絕漢恩一何深隔遠魏晉代猶足收民心
咄嗟呼韓子崛起蒲離陰自云漢壻甥赫怒開實沈
左顧龍在野右咤虎嘯林吹噓炎燼餘五部來謳吟
阿聰奮餘烈兩京隨掃平竊據二紀強文物有足矜
我來拜陵寢悚然振冠纓風雲渺何許廢堞餘金城
賢哉劉淑妃成此直諫名在聰未為疵假義淵可稱
孰云仁義師可敵不可征桓桓祁山舉一出三輔驚
天其假公年載洗

六合清此志竟莫遂此邦還有成所以廣武嘆痛惜無
豪英山烟知客意斜日生荒陵

遊萬固寺

中條鬱蒼蒼首尾固雄大連山一卧虎矯首盡兩戒東
南方峪門聲確入幽阨空青上絕壁截業兩崖對南山
開畫屏高下蔚萬檜扶藜到山門黃衣六七輩寺殘薄
心賞一水良可愛尋源入雲蘿不惜阮屐敗掬飲清臆
塵坐睨巨石怪山空響佩環林迴騰怒獬行聽溪聲回

周覽詢勝概當年爽心亭萬竹爭映帶碧鮮照清泚襟

袂濯沆瀣人境兩渺茫佳句儘誇邁

舊有石刻坡詩云水自竹根流出風

從松頂飄來座上盡為佳士更無一點塵埃

開軒邀客飯放目欣一快盤餐

固疎糲泉冽幾肉喂少焉林風振萬壑一氣噫前林疑

虎嘯作勇助吾憊筆落還自驚一掃衆峰靄

寺僧請書殿閣名故

云

山僧喜醉顛海會得珠貝興來本無心游戲詫佛界

夕陽送歸鞍依約虎谿外風烟作破墨塔廟失所在鍾

英厭摹寫悶狀化機藹盤空乏硬語技癢苦無賴馬首

詩遽成一笑豁吾隘

靜樂堂

人生霄壤間動靜藏妙用一為外物遷舉足非禮動惟
夫操存人而與天地共紛紜萬變來一一皆折衷問之
果何因性定心自統心宰物隨化奚俟人指縱體安氣
靜徐內契失急關茲焉須臾離不啻天地雲梁君出豪
右表表聳儀鳳意氣杯酒間談笑百金重一旦刮餘習
紛華不復夢省躬日有得守約還自諷霜餘波自澄雨

退雲知洞復我浩浩天多言譏屢中客來掩書坐香動
玻璃甕融然一室中萬象入持控知君樂無涯五絃歌
雅頌

舜泉

在河中府南三十里夏陽村東歷山聖人嶺下舜峪
內至元壬申冬十二月十四日來遊

舍鞍夏陽西塞裳躡雲頂盤折下濬溝失身墮幽阱孤
松突危巔望望雙目炯不圖兩芒屨踐迹聖人嶺重華

不復返欽此孝慕炳降觀臨帝泉冠佩為肅整泓澄一

勺多浩若淵水迴彷徨不忍去杯飲濯蒂梗慨焉念高

風滅沒翻倒景野人前致辭此事傳歲永有鰥昔在下

怒為瞽所屏窮歸此來田號泣痛自省空山無所得扶

耒子孤影彼蒼彰聖誠渴餒恐成青一人兩崖間二水

出俄頃北崖縈帶流南壑湛寒井至今山中人飲食了

二頃我生千載後懷古心耿耿風俗日淪喪道義奚所

秉安得天瓢手挹此霜露等千林摧姦枿比屋化封頽

滌易臣子心
骭骸變骨鯁
暮歸田舍眠
有志安得騁
此心恐未能
作詩聊自做
且當就岩巖
酌水煮殷鬲

跋席懷遠臨終語錄

人當易簣際
發言固不善
昏矇迷本真
狂者涉誕幻
猗嗟席懷遠
洞徹生死變
日氣薄西山
皦乎天理見
諄諄忠孝言
垂戒漢馬援
洒然明月懷
身後照鄉縣
賡歌諸賢詩
清風一家傳

錄老農語

陽曲道中作

老翁揭溝水駐馬待樹間雙脰怯朝涉歌傾激衝湍既
濟問老翁荷鋤何所還筋力一何弱甲子今幾焉斂手
前致辭星紀凡七旋有妻喪已久有子病且殘舉家無
營業止有田一廛禾生迷東西老雨荒草芊耘鋤庶有
獲聊以卒歲年饘粥乃餘事要輸包塿錢有身古當復
垂老聖所安二者不能必聞之鼻為酸我食爾所粒作
詩告京官

吳大使子明致樂堂

人生有至樂榮貴了不干人子有至養三牲非所先宣
父語經訓承顏首為難南陔著深戒不獨馨盤餐眷戀
庭闈心朝夕靡遑安問寢與侍膳樂在融融間所以極
愛敬要聲平生歡吳君出紉綺孝純思力殫垂領髮已
素娛親衣尚斑天意亦有在一官仕鄉闕稱觴歲上壽
香火欣團樂此身不願貴有家從苟完願親日康寧半
容紫庭蘭毫彩神與相慈顏渥而丹婺光藹萱室嬰香
芬珮環壺族化柔懿周南詠幽閑高堂敞溫清題扁存

鉅觀致樂無復尚守身老彌堅庶幾寸草心少報春暉
妍堯都三萬家清風渺誰攀作詩頌匪匱錫類君其端
會當蒙顯異寵光爛門闌三釜我祿餘履霜非謂寒一
飽及妻子因君起長嘆瀟瀟風樹底悲絕仲由冠

遣發僕夫李老櫬歸瘞淇上

至元癸酉後六月十九日死於平陽寓舍

來自東西劔相看二十年因罹兵燼厄重結主奴緣薪
水嗟初服耕耘遂所天挈身辭戮辱得病便沈綿藥餌

功無効棺衾禮罔愆汝魂應有識歸到水西田

感寓

荆岩產奇寶輝山生五色鳳鳥集其上採者終莫識卞
生具神眼抱泣天地珍稱喻日百至此璠此玕珉一世
竟莫售指卞為瞽人負之獻楚子致前須近臣豈知事
大繆反取按劒嗔獲譴或不賞戮辱終其身所以苦
節士萬古潛悲辛

陳村待渡

河行虛壤間隨意東西卧我遵汾水行十日凡兩過沮
濡變深澗野航驚漏破篙師怯吾衰傳呼細扶掖朝來
大陳渡細擺得久坐山川隱佳句軒豁矜寡和秋風吹
馬去行看林葉墮

沁水道中

蒼巔互出縮峪勢曲走蛇回眺驚後擁迎看復橫遮雲
林蕩高秋半嶺翻清霞十里九渡水清流帶寒沙山溪
本幽寂激之聲乃譁解鞍憩美蔭覺我心靜嘉風枝滿

秋實野菊被水涯幽馨散蘭馥紅鮮綴丹砂二物固瑣
碎託興騷人誇我欣記所見信筆書田家

宿板橋田舍

山村極幽僻坡嶺還四面麋鹿日與伍自餘無所見
來事文石供給半山縣倦枕聽呼號相次過夜半

過鹿臺山

在澤州沁水縣南二十里時被安西王命伐石於此
遠尋文石崗來歷南山纏鹿臺臺為山幽徑蟠古篆後

峪行未盡前嶺已當面秋聲蕩林樾風露淒以泫陰壑
氣翳鬱疑有虎豹變山田苦無多溝畹耕已遍柴援結
半空羅絡碧岩轉自憐終歲勤獸患防一旦我本山中
人束帶對郵掾頃然還舊觀瀟洒償夙願行經雙蟾嶺
石怪驚變現闖首榭樹間氣自太古練月中誰推墜四
鎖屬山縣乃知北平守認虎飲一作拍羽箭物肖本偶然
長歌下層巘

觀穫蕎麥

搖搖珊瑚枝浥浥露光潤霜餘秋寔繁壠畝欣一瞬野
人趁時獲施車施素刃前推約步長偃仆為一順風來
湯餅香玉粒夢炊甑田間還自笑三載總山郡肥甘與
菲薄一飯吾有分坎止與流行何思復何悶

臨汾節婦吟

松筠四時青特與凡木別弱草不自持風霜易摧折坤
柔變乾剛彤管古所說臨汾孫氏媼寡操抱貞節之死
誓靡它棲心入霜月事姑極孝養教子承世業神明與

扶持骨健丹浮頰我觀中壘傳於粲古英烈作詩備採
官徽名繼前哲

過鹿臺西崦

乙亥八月二十九日偕沁水縣尹李君飛卿眎治道
馬上作

鹿臺西南麓石路何杈枒青林轉幽深一水中可嘉遠
從半山來長流石為窪一泓湛寒碧野飲供麇麇濕雲
擁絕壁灝爽霑巾紗我忻為緩轡睠立溪之涯恍疑桃

花源錦樹蒸紅霞畸人指前途兩點蒼山髻

荅老農語

風梢怒號寒鴛言復西邁吟鞭趁羸驂直走壺口阨俯
緣絕澗源仰看孤石大陽崖柏青青陰嶺雪全蓋詩脾
儘餘清灝氣溢襟帶行行遇老農馬首言笑載前時使
君公治此逮困憊事成固國力規畫良匪懈一朝文石
去永利予等賴茲焉詎可忘衆意見遺愛連章供監司
大嚼伸一快既聞老父言慚汗流浹背道開非吾功物

出數有在況予分當然添足恐成怪夕陽澹前峰凝睇
飛鳥外是中有佳趣毀譽吾敢介

秋澗集卷二

欽定四庫全書蒼要卷一萬六千一百五十九集部

秋澗集卷三

元 王惲 撰

五言古詩

題玉石蓮花洞道院壁

東山一何高細路石龍窺
官從絕澗底陡上盤峻塚
模糊松間雪照映列孤砦
衣飄遠壑風馬滑陰嶺凍
捨鞍強躋攀憩定腰膝痛
吾非樂險遊靈跡訪仙洞
當年白帽翁恍惚見醫夢
進功力開鑿怒攫髯鬚動
手麾語怪徒

筆此真可備至今城市人誕說猶洶洶好奇更過予一
笑為腹捧西山遊欲徧物產多給用爾焉最不才任事
無可貢濯濯殆赭餘地冷物寡種我來探是穴木葉恣
填壅青藜試撥觀陰背一罅孔廣深無丈尺蟾吻呀劒
喙回環聚乳坎歲久垂巨蛹白猿竟何有流石變擁腫
太史載禹穴登覽想森悚不經聖人作後世妄增寵况
茲何足云遺構託以重作詩破羣疑擲地驚墜壘道人
亦釋然別遠猶目送來者倘志同三復賈餘勇

御驃出廐圖

何人拂絹素寫此房駟精一馬老伏櫪志在千里行二
馬騁躑躅角壯猶龍騰一馬方輓塵海岸翻鯤鯨畫師
慘澹意落筆矜多能我觀寓所感國制貴有經唐人重
馬政分屯列郊坰當時百萬匹肅肅羅天兵東封與西
蕩歲用不可勝嗣王獵其餘尚足開中興乃知三軍本
匪馬將奚憑聖經說備預萬古為世程倉卒事亦辦未
免衆目驚我思立仗閒振鬣伸長鳴吾言固葛蕘聖經

其可輕

題呂充隱和陶詩卷後

呂字明復武陟人金亡居襄陽尋渡江居鄂

昔從顓軒遊嘉話半耆耆每及充隱君稱道弗容口自
憐野逸安佳趣乃師友聞風即欣慕高興渺林藪況吟
平生篇開卷粲瓊玖君詩江西來一旦落吾手正襟三
復餘酣飲得重酎外枯含至腴霜落溪水瀏嚮來和陶
作雲夢吞八九金鑪出大音何俟寸莛扣吾愛先生心

吾尚隱君守當時淮西役臨事見不偶吾策君可屈此
身孰得有先生歌鳳徒簪紱胡可誘高情薄雲月流詠
見不朽九原倘可作清江變醇酒眼中杖屨來礪礪門
邊柳與背一壺遊秋毫峴山首

昆陽懷古

行役宛葉郊路入昆陽城淦水抱城左蕩潏東南傾川
原入四顧蟠互多崗陵城頽削懸崖草深惡鵠鳴嗟爾
一抔土當此百萬兵莽圖十九年聚此天為阮王者况

不死千騎驚龍騰漢業
兆豐沛赤伏此中興
創復兩不易山川賁雄名
東西遙相望盤盤兩神京
千年事雲散草木含威靈
野人無所知城邊事春耕
扶犁上廢壘隴畝縱復橫
只因懷古士千古愴餘情

為東坡昆陽城賦

苦熱嘆四十六韻

效昌黎體

祝融駕大蚪頓轡周八裔
戰酣西北乾回薄餘暮熾
朱光沸虞淵大地蒸一氣
蒼茫夜色濕酣鬱玄象醉
今年六月中荼毒逾往歲
金晶才始伏燂怒勢比銳
炎官張

火傘屏翳揚赤幟四合歆陳來一鼓赫離冶天潢影半
涸星鳥芒欲彗吟風樹葉噤塌翮林鳥墜併兼坎兌權
不使天地閉王城十萬家燠灼迫一勢乾坤墮熾爇逸
德駭天吏掩闕人事絕藏伏敢口議褰裳起中夜通夕
不容寐捫背赭汗流窺井湯泉沸松間有困鶴無夢到
清咲牆根有腐草螢化光哲哲穿簾入我室照眼驚火
齊陰蟾遁老魄火鼠騁黠智夜深過我前跳躑翻飲器
屋古又足蝎伺螫尤謹避簞紋燎炎輝側脅能少憩舉

動體愜熱歔歔氣短細抱冰眠或可揮矐何所濟二年
客京師身幸置散地雖無束帶勞唯老覺加倍徬徨不
知曙種髮沐而被四序本平分偏盛誰所致火攻出下
策不已燔萬類嗟此一世人喝死將何厲此生匪金石
流鑠吁可畏內熱復自焚衰槁將立至燥惟必靜勝事
須以義制冰山詎可依煬竈非所媚遐想崑崙巔庭觀
何偉麗巍然五千仞日光隱蔽回環十二樓空明澹
無際水晶作柱礎羣玉絢軒陛天風掠枕席月露濕環

帔瑤臺擁灝靈萬舞發清吹真仙事朝元鸞鳳互駢翳
閨風接玄圃追陪憶遊戲何年墮塵緣坐想無由詣安
得萬里風振此垂天翅脫落區中囚高舉尋吾契

聽講呂刑諸篇

至元十六年己卯歲冬十二月十七日中山府明新
堂雪夜會府尹史子華貳政朱信卿洎諸吏屬聽教
官滕仲禮講周書呂刑論孟諸篇

淒風布雲葉寒日慘不光先集觀微霰轉盼驚毛楊一

天陽和氣散入中山堂公堂何所有曹務紛刑章竟日
椎與扑令人足悲傷廉隅是何物僥倖為尋常淪胥一
至此禮義從消亡涉淵不自濟試以舟楫航郡侯樂與
善揮提噪其傍况復得佳士問學陂汪洋一編周穆書
噩噩深慈祥爰念盡心戒披衍何琅琅敷明發蘊奧遠
紹開微茫大羹得至味黍稷非馨香孤白有餘燠散緼
非所當衆目鑒聾聵同僚益溫良夜久不能寐孰知水
雪雱定武古戰國風俗稱雄強今夕復何夕弦歌破天

荒吏散擁衾卧薄俗思溥匡大決洙泗波浩蕩前羣盲
此事恐難必此志詎能忘一州稍安行一方賜無量比
老及一見此外吾何望打窗聽雪聲起視夜已央

謝子文龍尾藤策之贈

子文善方伎好從吾輩遊城居三十年藥惠遍八州我
過駐棘津數見禮聿修循循似不能氣貌何和柔贈我
龍尾研加以蒼藤脩杖為扶我衰研用供冥搜入手三
摩挲白雲滿汀洲意重無所答在我將何求君言愛余

書落紙雲烟浮倘蒙數字惠永作千金收既聞因語君
我老拙所謀有時縱惡札聊用寫殷憂如君濟物心胡
為效予尤喜抱敝帚歸兩袖紛琳瑯客去倚窓坐念之
思夷猶一作悠悠誰期淡癖中亦有同好流呼兒一題詩持
贈相為壽

贈仲溫教授求授真訣

僕年五十餘氣志覺衰耄耳厭秋蟬號目眩昏花眊癢
鍾百態具何啻鬚髮皓竭來觀津邑有幸遇醫老仰開

浩浩天俗學歸一掃息心抱吾真辨之當在早人生堪
與間雖靈貴強矯不然一物耳歲久等枯槁况復智物
誘內熱日煎擾不聞山水喻樗散元壽考守身為最大
自餘皆細眇亟當念所存夕惕謹持保授我內經旨根
命入幽討促膝語三日底裏為傾倒會合豈易得相逢
恨草草多君濟物誠憐我慕孔禱夜闌耿無寐再拜獲
至寶作詩代瓊琚相期永為好

泛漳篇

并序

予以王事奔命今春環走二千餘里前次漳陰車殆馬煩且得目眩髀痛疾遠不能騎舟行東下庶得一日之休富覽大川勉卒來事作泛舟篇以見意時至元辛巳四月十一日也

盤盤魏大名屬縣行且周銷我髀裏肉四月猶綿裘舍車出漳陰步上枋頭舟咿啞理雙棹信船下中流清風泛微瀾篙師訝當頭豈知河伯意故故為遲留汀花助行吟孰取澤畔愁解衣卧蓬底穩似畫舫幽駭觀兩岸

移灣環轉林立灘回淺能溢波富去自猶拍拍風水聲
雨打空階秋白鳥何處來雪點河之洲前飛如導予翔
集如啁啾欽念川上嘆晝夜何悠悠宜為智者樂曲折
涵至柔中擅利物功轉漕半九州君看萬斛載掀舞一
葉浮仍為勉不見能若茲水不行行望沙麓且得一日
休呼兒覓殘紙題作漳川遊

柏亭嘆

至元十八年七月初二日次柏鄉因所見而作

鳥巢一枝多回薄萬榦林富覽擅已有振羽辭凡禽傾
身附老鵲翔集千仞岑既切彼所習復接鳴鳳音秋空
恣搏擊鷲老有弗任勢大不兩立擠彼歸幽沉健雛從
天來赫赫威制臨毒拳奮所宣坼裂顙與衿縣官籍其
家富埒郭穴金懷璧匹夫罪況此皆漁侵行值柏亭傳
緩轡惻我吟前車滿孥戮後車載瑜琛乃知非分福禍
養儉人深行路莫為惜但云神理枕豺豕與蛇虺吞噬
盖本心天道喜報復自昔非獨今戾氣容有已怨讎日

相尋一禮制萬動千古聖所欽何當民志定無復借與
淫

九門道中

至元十八年十二月六日同察司諸公會葬董簽院
於南董高里原還過九門故城作

朔風暮轉劇曠野埃霾昏長鞭驅羸驂日晏東南奔義
有執紼役重過孤城闔邑居廢與置代遠不必論緬懷
武靈舉騎服開雄尊國聽固自我臣義贊亦惇潛師襲

中山萬馬出此門林樓九原塞英氣為一吞睥睨五雄
間霸業幾桓文至今西林阜隱隱猶兵屯一朝探雀鷁
瘐死秋槐根人事靡不初克終乃可云野老無所識引
宿投荒村吹燈具萍粥土銼藝使溫解我寒悴色謝官
非所存就枕固不寐一覺東方暾

野河渡

蒼茫劉橋渡南北凡幾過清霜十月交澄湛東流波飲
馬立水邊照我兩鬢皤行役非所苦傷懷動悲歌三年

恒山趙彈劾兼拊摩磬磬眼中民力弊差與科不能一
勺潤慰彼煩與痾顧此衣帶水溉載功寔多人而反不
若低首愧野河素餐吾可逃奈此蒼生何

菊嘆

沙河縣作

佳菊如幽人疏畦溷凡卉遶叢嘆萎暘與我初不異秋
香期爛漫培植須早計呼童溉清泉乘曉看生意繁根
溢芳滋秀色失枯悴一物苟獲養面背見盎粹人生胡
不然浩浩存夜氣

入前浦中間吏因緣為弊不可數蠶稍貪如狼總壓暴
於虎所經輒繹騷不啻被掠虜盼盼入海口未免風浪
鼓舟中一斛粟百姓幾辛苦今復起堰埧壅積百萬禦
木石動萬計科配困氓伍不思根源微隄障深幾許轉
漕本便民廣儲寔國補事功貴順成勉強終齟齬海道
事已然又復有此舉惜將生民力委棄若泥土山東實
重地一靜乃可撫嘗聞建隆間有相曰趙普凡百投利
人能遣皆不取以茲報國恩後世比申甫黃閣十餘年

清風一萬古

元日示孫阿鞬六十韻

璠璣世重寶就器須磨鐫杞柳固凡木矯揉成栝栳人
雖物之靈學則全其天蛾子積大垤禮經存至言多學
卓有立孔門稱子淵吾年八九歲入學鄉校間外傳既
善誘汝曾吾勉旃暮觀子夜後晨讀霜月邊日課字三
百熟誦例半千十三至十六詩賦填全篇十九學蘇門
遂親經史筵潛窺義理窟弄筆勢翩翩遺山紫陽翁鹿

庵暨神川四老鑄頑手誨我扣兩端騰口為獎借孺子
有足觀自後雖努力已為家務纏隨復就力列一身縛
微官道德負初心聰明非目前歲月不我與齒豁童其
顛猶能致祿位分持憲司權出入竊蓋陰紫袍金帶鮮
舉家初不識啼飢與號寒政自稽古力汝曾極周旋切
誠習刀筆有來戴儒冠傳家無長物臨終付青氈有書
五千卷大半親手編三世無白屋辛苦天所憐多財祇
益愚讀書可希賢遺訓毋比替我目瞑下泉汝生今十

歲小字名阿鞬貌端媚且靜氣吐清而圓妍皮裹癡骨
了不直一錢致身文學中不負三輩傳後事實汝責窠
雛望飛騫四民士為貴六經學之原身安得所師志節
先強堅憤悱務時敏効習心眼專人十已則百人眠已
不眠事業一燈苦聲華四方喧唾手取青紫如拾地芥
馬子孫巧華澤其祚將綿綿但見讀書貴但知讀書便
重則復其家輕則雜泛蠲不見編戶氓差徭日相煎里
胥徵歛急追呼到推牽汝若學不立非農即商鄺更下

作奔趣為人執弭鞭爾雖士夫裔所習失之偏不學入
常流學者乘高軒我嘗感時輩貴賤難相攀何啻龍與
豬過甚霄壤懸子孫轉下愚門戶日凋殘或祇為士子
終身尚高閑向來徵歛暴畧不相為干近多置書家萬
卷圖好看來者不一讀非貿即棄捐人果不好學方寸
如廢田良苗復何有菲塞深荒煙皇皇七篇書義利何
昭宣堯舜等人耳有為即差肩我家徙鄆衛將近二百
年素業農與儒宗族頗嬋媯囑汝善繼述可光新鰥阡

我老不足法汝曾言不刊念茲復在茲敬之若銘盤力
學貴穉齒收功良匪難幼成若天性習慣如自然所以
昌黎公恩義我奪遷願汝事斯語佩服如韋弦我文多
漫與此詩不可謾

桑蟲嘆

行行桑間人執柯爭擊扑樹根擁圓壤持鋤待掩覆云
是振桑蟲除治絕遺育拙哉此何為與蠶同出沒千林
線如雲一掃若湯沃不知絲忽腸其大容幾斛春蠶眠

正飢蠹蠹富厥族湯盆出新絲奪自汝口腹無衣四海
寒十千帛一束老農前致詞近歲旱何酷無乃民作孽
其或時事促十年餐儉食邇來儉不復嘗云和致祥對
成繭與穀皆緣一氣間修省轉蓄福望望惜南乾汝等
稱濟物駐驂荅老農嘿爾私自囑調元真宰事吾輩乃
碌碌低頭愧畸人張口待廩粟

靈光塔

并序

予自京師南還赤日黃塵走六百餘里及登茲觀煩

襟倦思頓為一醒因書斐作二十一韻以記來曾

我從京師來望望入定武靈光古傑觀我業上雲雨何
年僧令能建此壯佛宇浮雲衛浩劫神力湧坤土經過
二十年未暇登陟舉坡仙遺墨在平日思一覩初穿若
蜃樓轉上疑戰櫓拾級有餘平緩步無陡苦最愛洞腹
寬豁達儘容與盤折抵絕巔未省吾背倭心清聞妙香
風烈不知暑迥臨增雙明徙倚慄兩股潯池黃一綫太
行青可數江山有清眺萬象入延佇乃知灝爽氣物外

自吞吐應怜闌闌人下與塵空件斜陽淡高層風鈴時
自語靈光久無光雄筆照千古摩挲墨花昏瞪視遽如
許清風冠高標猶足跨虞褚龍象幸護持取重此宰堵
宰堵波佛經
云高顯也

春榆歎

昨遊封龍迴行行憫農耕午憩得美蔭飲馬常山城有
婦挾筐筥木皮拾縱橫柴門臨野碓春治無停聲朝食
此皮麵暮煮此葉羹揀荒比上食殘喘聊支撐話已長

嘆息一飽何時盈我因慰田父努力無歎驚皇家澤霈
霈蠲盡租與征閱月凡四雨禾苗見青青又聞使四出
訪問民間情有害思與去有利隨使興惟期和氣應應
得來休徵寧心待斯須會見秋有成

折齒吟二十四韻

吾年未四旬顱髮白勝雪兩眼眩生花一耳或通塞所
喜牙齒牢未省有殘缺飲食雖基壽齒壯物猶嚙庶幾
桑榆境健啖延歲月所以齧與餅飢來若刀截今晨具

盤食輒肉固纖屑一嚼出不虞左齒拉而折羣稚慘不
嬉病妻驚欲絕汝老不自量無故取摧摺予云盛則衰
百醜見兩頰平生好言辭咀嚼出五色文戰怒欲碎醉
飲乾甚決運用勤亦至半百當衰茶一作歌時時以舌舐
乍脫覺中熱一落不復生根杈漫枯枿駭若中堅摧闊
於山口豁自今須慎護作事思妥帖一柔勝百堅有味
老聃說哈呀動恥念顛倒漱水怯猶勝昌黎公餘者堅
尚潔既不妨歡歌底用心甌甌齒隳端午前詩裁重午

節成虧恐有數歌以散憂結

癸未七月秋分日鎮陽澤宮弘道堂讀韓子有

感

盤盤素王宮鬱起金粟背厭喧卧片堂枯心暫在岡
平勢尚隆雨久晴亦快風清自遠至雲奇堆戶外一編
子韓子至味欣一噉時當八代衰道脉僅如帶先生希
聖徒扶觚由我泰詠歸渺聖門簞食乏藜菜顧時有汙
隆盡我志所逮皇皇仁義心自任乃爾大橫流嚙巨防

力障俾勿壞排陰入九地孤唱肅萬籟困客初不計百
折氣益邁要當沒則已不易下惠介書雖不盡言後學
有足賴真知程子說安石詩自阮荀楊公所譏鄒後無
接派道心得非深能遽發此慨略內詳外言恐就述作
概我知踐履功當世仰崧岱後來立論者志毋以辭害
文平極道腴筆肆走光怪私心適有會何翅讀屢再雄
名儷景翻浩氣振吾儂起拜辟間像顙泚覺雨霈宜乎
配神庭血食昭萬代

董大夫廟

在元州城北門內有宋元祐間縣宰宋保國壁記云縣西南八十里有廣

川店隋避諱改長

河縣今將陵縣也

吾觀漢家制所法皆亡嬴中間去取之易苛稍寬平何
參不足責本是刀筆生文景尚黃老申公負虛名賢哉
董大夫三策冠漢庭論說天人際高吐三代英仁義我
所重功利我所輕紛紛弘湯間獨能尊聖經所惜王者
佐竟老膠西卿過脩得遺廟再拜冠與纓至今讀公書
片辭皆世型浩浩廣川水萬古朝滄溟因之觀其瀾吾

道得少行

漢丞相條侯廟

遙遙漢脩國落落真將軍至今有遺廟突兀城西垠維
景四葉帝恩濫椒房親高帝白馬約侯封乃忠勲區區
王氏子何功復何人丞相懲呂禍安劉念先臣所重社
稷計豈憚嬰其鱗竭忠固臣節返得快快嗔大哉不設
箸薄責等上尊瘐死何所嫌景皇似非君

泥阻小大西門道中

七月
四日

常山抵鵞靛望望百里近我行潯水陽秋漲勢纔緊氣
蒸暑肆虐雲駛雨作陳經塗被遊潦間關阻前進固知
路未夷畏此簡書迅東西大小門咫尺浮圖鎮泥淤壤
轍深車陷雙輪輟顛蹶困長耳喧呼空斷勒于役非其
時跬步有至遴用極壯則吉人牛親倩問言形半公私
物應有違順禮讓䟽慊荒非係風土恪侯門仁義存河
去安所潤赴官此花開斯語未盡信暮投田家宿何翅
夏畦病苦熱不能眠伏枕聽露蚓

鋤耨詩并序

至元二十年癸未歲七月四日赴任濟南道出藁邑
西南鄉觀農人用鋤耨理田時秋霖開霽嘉穀滿野
閒人喜為賦詩不知何時得與若輩耦而耕

雙竿駕特牛獨脚雲耳並紛紛捲土落一刻草蕃淨是
名為鋤耨初不見田令行觀數畝禾草去苗意盛中心
覺欣快圖蔓得機柄種多我力寡匪此何由勝一作人
定果能
勝神農製田鎡耨耜理之正茲焉述後來初出驚智竟

荆公重農本一一見歌詠青苗變箕歛大為當世病千
年負深譏言不覆所行

牛升哥詩并序

深州靖安故城牛氏子升哥年十歲能白翦諸字試
之誠然點畫波撇甚有可觀者其父來求詩因走筆
賦此七月八日

人生有至性凡事作不難豈問年長少智巧出百端阿
升甫齟齬能用金剪刀一字初不識所見禾與蒿字形

雖百態裁成思無勞樺膚描細像棘端刻飛猱往往從
効習猶足驚兒曹我因囑乃父宜令筆墨操學焉苟不
輟會見為書豪

聞談劉齊王故事

并序

七月十三日宿阜城縣解教諭劉元輔話廢齊祖塋
在縣南十二里今謂之御莊至今石馬在焉明日次
元州陳教授又說豫未貴時一日顧見一白龍現婦
翁家大鏡中但無鱗與角耳後乃岳亦見以女妻之

資藉之力甚厚及生二子以鱗角名之或者謂二子
長豫當大貴後果然

劉公布衣時往往人鄙棄婦翁識其賢資藉極至意龍
騰鏡光中第闕鱗角異用補二子名既長志果遂八年
阜昌齊有命終閏位至今說奎銀記子返為累為淵既
鰌魚齊安得不廢竭來過故城人指金華地公昔此讀
書葱鬱見佳氣尚看書帶草碧色映階砌蕭條縣南墳
猶以御莊謂石馬轉無聲山冢久蕪穢空餘一字詠流

播傳後世邦人陳與劉因話談及此

過深州故城有懷韓昌黎解牛元翼園事

維唐有藩鎮連衡皆盜區污孽互相濟殆似背脇疽心
腹訐蟲賊膏血化蟲蛆厲階安史亂王澤不遠敷河朔
有故事誓作効逆徒堂堂裴中令夷蔡恢皇圖聊乘破
竹勢一制三鎮污腐敗就與決大赫天王誅彼相中妒
梗百裴竟無如事機一墮地涵漬終喪軀所以賊湊輩
血人於牙鬚既戕弘正忠復抗新使符靖安門畫鎖長

圍困紕疆昌黎解

關

言王畧始得舒信乎立大事臨機

見真儒東征過故城往事秋風徂得人國無弱懷古重
欵欵文公豈多得元翼何代無

賢哉霍生行

霍宗字守道世商賈二子長曰思廉次曰思文

賢哉禹城霍傳家惟永圖一身坐服賈二子使業儒虛

館致師範

謂董宗道也名師舜濟南人

捐金買詩書所願士行列所

願德依於利達非素望爵祿非所覲厥修日有來此心

得安舒我職宣教責東行式其閭二子出拜我樸厚中

若虛呼前試講說固覺回不愚我因囑乃父義利不並
居頓首謝使者行將帶經鋤祝阿幾萬家從古禮義墟
爰自兵革來雖刀衆為趨瀟瀟枳棘間一朝見鵷雛孝
弟道甚邇色怡步徐徐聖賢事不難經訓即畱畬二者
有餘裕文章自華腴要知特達舉張本德與譽切戒作
而輟又慎終匪初勤苦天不負流芳子孫濡或祇稱善
人已為舜之徒讀書不求官此語聞大蘓譬如飲不醉
陶然歡有餘賢哉霍君心能與坡意符因之訓二子此

詩不可無

七月二十三日客禹城作

題洪崖先生卷後

昔夢洪崖仙遺我雪色鹿振衣登長崗超邁翥玄鵠山
精與木怪役使供走僕至今青城山神爽動林谷三郎
老溫柔妄意企仙躅兩行招隱書空霑岩桂馥誰能拍
其肩翳鳳事追逐我欣拜遺像及此凡數幅仙標入遐
想茲畫更清淑掩卷見南山高興渺烟麓

出香奇石

張生貯奇石攜來有遐觀一峯華不注墮我几案間穿
穴作怪供突兀橫蒼顏炷香烟滿竇野燒生春山我久
汨俗冗對之心暫閒瞑坐清興遠夢與孤雲還

洗研示孫阿鞬

書生事筆耕窮年治農圃我貧未是貧四貴會文府

東坡


謂筆墨帚硯
文房四貴

伊硯供我用小大不恒主磨硯積有時敗

墨雜垢淤毛錐泊厚漬豪蕩失劍舞墨石不相入肝膽
幾越楚呼兒濯清泉外難思一杼枯蓬發寒芒炭柳屏

宿汚玄泓連紫臺月露憲天宇炯炯鸛眼碧婉婉修眉
嫵歛絲紛霧縠秋色鬱端渚更怜綠玉泚金桃啄鸚鵡
石中有此理面目開太古不辭襟袖黜一一重摩拊朝
元圭瑟瑟響秋雨聽餘思脩然揮洒方得所玩之
有感滌念易心慮元來況本善物誘失初度賢愚不
相遠克復在朝暮昏蒙貴擊伐氣志成情窳淬礪能日
新天理自昭著願渠體終章吾豈為研賦

秋澗集卷三



總校官庶吉士

臣侍

朝

校對官學正

臣

卜惟吉

膳錄貢生

臣

繆

濂

膳錄監生

臣

魏

繩曾